

小  
腆  
紀  
傳

小腆紀傳卷第四十七

前翰林院檢討加詹事府贊善銜六合徐鼎謨

列傳第四十

義師二

錢棟

錢棟  
錢應金

屠象美  
項嘉謨

鄭宗彝  
張翊

弟宗琦

姚志倬

方元章  
張起芬

金有鑑

王士麟等

李長祥

章有功

馮京第

王翊

王江

張夢錫

陸宇燭

弟宇燦  
毛聚奎

華夏

謝寅生

王家勤

楊文琦

弟文琮  
文球

文璜

杜懋俊

施邦珩  
杜兆珩

屠獻宸

董德欽  
李文瓚

錢棟大學士士升子也枬巡撫士晉子也嘉善錢氏門第冠其鄉而士升士晉尤著棟舉崇禎丁丑進士枬舉癸酉舉人皆官主事乙酉閏六月薙髮令下嘉興民揭竿起者數千人翰林屠象美主之棟毀家充餉事敗殺於湖越二年松江吳勝兆事起枬坐匿陳子龍遇害妻徐氏殉之

屠象美平湖人崇禎辛未進士官翰林乙酉閏六月嘉興之城守也推象美主其事顧文士不知兵迎都督僉事陳梧爲帥倉卒起事資糧甲仗復不備

大兵自杭州遣騎兵襲之城上聞笳角聲已膽落戰敗出走爲亂民所殺梧事別見

鄭宗彝嘉興諸生屠象美錢棟旣死宗彝復袒臂呼市上從

之者千人城守十有六日有通款於

王師者城遂陷宗彝與弟宗琦戰死一門皆盡城亦被屠又諸生錢應金城陷走邨居遊兵掠於野見其髮未薙也殺之項嘉謨秀水人以文士投筆渡河出塞官勸遼守備尋棄官入閩登武夷曹學佺錄其詩入十二代詩選

王師入嘉興東生平所著詩賦於懷投天星河死子翼子心妾張氏殉焉我

朝賜通諡曰節愍又張翊者諸生也城破整衣巾南面正席坐兵以刃臨之罵不已遂遇害

姚志倬錢塘人官瓶審副將乙酉閏六月與參將方元章誓義舉兵閩中授平原將軍浙東封仁武伯以張起芬爲將破

餘杭走於潛戰敗志倬逸去元章死之明年丙戌冬合餘眾  
攻江山又不利遁入括蒼山中既而出懷玉山其兄志元訛  
稱志倬已降因得脫而志元被戮乃走依詹兆恆同破永豐  
兆恆敗志倬遷徙無常癸巳春率所部依定西侯張名振是  
冬從名振破

王師於崇明之平陽沙明年進攻崇明歿於陣起芬被執至  
杭不屈懸之樹間射殺之平生不讀書刑訊時有詩云頭能  
過鐵身方顯死不封泥骨亦香

金有鑑長興人有膂力乙酉六月率里人許昇沈磊沈士宏  
金鑾色等奉通城王盛澂爲號自署總兵一戰拔湖州進攻  
長興不下吏員王士麟引兵會之再攻再敗士麟戰死十月

有鑑戰於呂山盛激遣金琪字毛蜚卿率兵二千來助復不克尋遣總兵賈應龍楊象觀吳永昌參將金筠鹿等合軍奪城復大敗回至梅溪盛激弟盛滌被圍急有鑑單騎援之身中七矢遂收健卒數十人走宜興山中與岑元泰保守山寨大兵逼之三戰三北明年正月復攻長興有鑑元泰俱陷陣死又有徐昌明者初入盧象觀軍署監紀推官旣敗奔四安山與有鑑合軍亦死於長興西門

李長祥字研齋達州人崇禎癸未進士獻賊亂蜀以諸生練鄉勇助城守賊中皆知名後選庶吉士吏部薦之備將帥之選或曰天子果用公計安出歎曰不見孫白谷往事乎今惟有請便宜行事雖有金牌亦不受進止待平賊後囚首闕下

受斧鉞耳聞者咋舌時首輔陳演以同里故欲引爲私人不可因不得召見賊日逼上疏請急調甯遠鎮臣吳三桂兵入衛新進士袁盡具將才可輔之令密雲鎮臣唐通與臣由太行入太原厯甯武雁門攻其後首尾夾擊賊可擒也議未定而唐通至詭請守居庸關則縱賊直抵昌平長祥復疏請急令大臣輔太子出鎮津門以提調勤王兵不果行而京師潰爲賊所掠乘間南奔宏光時改監察御史巡浙鹽魯王監國加右僉都御史督師西行而七條沙之師又潰監國航海去長祥以餘眾結寨上虞之東山時浙東諸寨林立四出募餉居民苦之獨長祥與張煌言王翊三營且屯且耕井邑不擾監軍鄞人華夏者爲之聯絡布置請引舟山之兵連大蘭諸

寨以定鄞慈五縣因下姚江會師曹娥合偁山諸寨以下西  
陵僉議奉長祥爲盟主刻期將集而爲降紳謝三賓所發

大兵急攻東山前軍章有功被執死中軍汪策者與百夫長  
十二人期以次日縛長祥入獻晨起十二人忽自相語奈何  
殺忠臣折矢扣刃偕誓而遯長祥匿丐人舟中入紹興城居  
數日事益急復遯至奉化依平西伯王朝先朝先亦蜀人得  
其資糧扉屨之助復合眾於夏蓋山一日泊舟山下有孽龍  
挾雷電將上天濤湧蕩舟士卒無人色長祥令發巨礮擊之  
雷電愈怒水起立長祥神色自如俄而晴霽由健跳移舟山  
入朝監國晉兵部左侍郎兼官如故請合朝先之眾聯絡沿  
海以爲舟山衛張名振忌之襲殺朝先長祥僅免辛卯舟山



破亡命江淮間我總督陳錦捕得之安置江甯妻黃氏卒大  
府疑之曰是子然者誰相保邪長祥微聞之江甯有閨秀曰  
鍾山秀才善墨竹容色絕世乃娶之朝夕甚暱大府曰李公  
有所戀矣未幾乘守者之怠竟逸去由吳門渡秦郵奔河北  
遍歷宣府大同復南下百粵天下大定始還居毘陵築讀易  
堂以老

章有功李長祥前軍將也故會稽農家子驍勇敢戰所將五  
百人皆選鋒屢戰有功戊子翻城事敗

大兵攻東山被擒拉脅抉齒猶大罵而死

馮京第字躋中慈谿諸生乙酉南都破起兵湖中魯監國授  
御史戰敗入舟山依黃斌卿水軍都督周鶴芝時亦駐軍舟

山固與日本撒斯瑪王善遣人以齊之存衛秦之存楚勸之  
撒斯瑪王許之鶴芝大喜備珠璣玩好之物謀以參謀林籛  
舞爲使斌卿止之曰此吳三桂之續也鶴芝怒而入闕京第  
曰北都之變並東南而失之者是則借兵之害也今我無地  
可失比之前者爲不倫矣斌卿於是使其弟孝卿偕京第往  
抵長琦島值日本與西洋人相讎殺兵甫解不聽登岸京第  
於舟中拜哭不已並致血書撒斯瑪王聞長琦島之拒中國  
也曰中國喪亂我不遑卹而令其使臣哭於我國我之恥也  
與其國之大將軍謀發各島罪人致洪武錢數十萬長琦多  
官妓孝卿樂之若忘其爲乞師來者日本人輕之益無出師  
意京第鬱鬱歸師竟不出自湖州間行入四明山與王翊合

軍守杜舉爲

王師所破翊走天台京第匿民舍亦往來舟山聯絡諸寨監國晉侍郎己丑再出破上虞庚寅九月

王師洗四明山寨翊避入海京第病不能行居灌頂山中爲叛將王昇所殺

王翊字完勳餘姚諸生有智略王正中薦之魯監國授職方主事以軍事屬之已而正中與黃宗羲合軍西渡江上破宗羲引殘卒入四明山結寨山民攻之時翊方走海隅

王師購之急囚其弟翊以招之翊與幕下諸生皆不屈死翊泣曰是真不負完勳家也既與屠獻宸華夏等謀襲甯波不克乃以所募眾入山尋破上虞殺攝印官浙東震動

王師由清賢嶺入敗翊眾於丁山屠四百人有孫說者中流矢死屍不仆御史馮京第自湖中軍破亦間行至四明與翊合軍杜壘山民之團練者導

王師攻破之別部邵不倫亦見獲京第匿民舍翊以四百人走依威遠將軍天台洞主俞國望謂諸將曰是皆團練之罪也北兵雖健吾視其銳則避之懈則擊之非團練爲鄉導彼安敢行險地如枕席乎吾卒雖殘破團練尙有餘力遂自天台至四明擊散團練者隨道收合得萬餘人而京第亦出明年己丑春再破上虞走其知縣告山中父老曰前此諸將橫擾激變今我軍足爲是山衛而一無所擾倘念故國其許我乎遂結寨於山之西北境曰大蘭山號大蘭洞主當是時浙

東千里之間山寨鱗次蕭山石仲芳會稽王化龍台州俞國  
望金湯吳奎明奉化袁應漣浙西之湖州柏襄甫等亦應之  
其餘小寨支軍不下百數然皆招集無賴從事鈔掠惟翰林  
張煌言軍上虞之平岡御史李長祥軍上虞之東山及都督  
章欽臣軍會稽之南鎮則皆且耕且屯而不擾於民而又單  
弱不如翊雄列城畏之若老嫗當道城門晝閉六月監國之  
健跳翊發使奔問埒貢方物監國遣官詣寨授翊河南道御  
史副都御史黃宗羲上言諸營文則自稱侍郎都御史武則  
自稱將軍都督惟翊不自張大而兵又最強品級懸絕非所  
以獎翊且無以臨諸營也是秋翊朝謁舟山擢右僉都御史  
時會稽嚴我公充我招撫使徧慰兩浙諸寨走降相繼我公

因渡海發使入四明山部下左都督黃中道謂翊曰田橫不烹鄭生於說降之時其志屈矣及其後而烹之不已晚乎翊曰善執其使而烹之我公懼遁去庚寅春三月再謁舟山晉兵部右侍郎破新昌拔虎山秋九月我將軍金礪由奉化提督田雄由餘姚會於大蘭仍用團練兵爲導翊累戰不能抗遂帥親兵避入海京第以病不能行居灌頂山中爲降將王昇所殺辛卯秋七月聞

大兵三道下舟山乃復入山集散亡爲援而諸將死亡殆盡旁皇故寨父老勸之由奉化招兵榆林白溪間是夜有大星墜地有聲野鳥驚噪父老憂之詰朝二十四日也將由奉化出天台至北溪爲團練兵所執部下參軍蔣士銓從之越日

過奉化賦絕命詩日東幘掠鬚謂守者曰使汝曹見此漢官威儀也時我羣帥集定海總督陳錦訊之翊坐地抗聲曰成敗利鈍天也毋多言八月十四日行刑羣帥憤其積年倔強聚射之中肩中頰中脅洞胸者三如貫植木不少動又截耳刳額終不仆斧其首始仆時年三十有六從者二人一曰石必正一曰明知不肯跪掠之跪則跪而向主並死懸翊首鄣之城西門友人陸宇燾謀之義士毛明山江漢篡取以歸藏之密室名不波航中凡十二年每寒食重九招同志祭之放聲慟哭雖家人莫知爲誰祭也癸卯宇燾以海上事牽連入省獄有司籍其家旣去其女屏當遺棄於櫃中得一錦函啓之則赫然人頭也其弟宇燦哭之曰此王侍郎首而得不爲

有司所錄天也遂束蒲爲身瘞之城北我

朝賜通諡曰烈愍

王江字長升慈谿諸生與王翊倡義四明山之大蘭洞內設五營五司五營主軍翊統之五司主餉江任之翊善治事凡所剖決靡不悅服一時四明之有訟獄者不之官而之翊江善會計量富以勸履畝而稅兵無盜糧以故四明二百八十峯之租賦亦不之官而之江強毅不加翊而智略相埒魯監國授戶部主事

大兵之入山也縛江母以招江削其髮以僧服見得安置杭州未幾母卒江忽置一妾昵之甚妻日夜勃谿江控之吏出之妻亦攘臂登車歷數其隱微之過渡江徑去聞者無不薄



其爲人一日江出遊湖上守者以其妾在不疑久之不返始知向者以術脫其妻也江旣得逸攜妻復入海朝監國於金門定西侯張名振請爲監軍再入長江乙未名振卒丙申有沈調倫者復起山中江赴之人聞其至壺漿相迎

大兵恐其重爲舟山犄角急攻之調倫見殺江中流矢卒已復有休甯趙立言者亦以餘眾棲山中與江山諸生李國楹約取江山明年元旦立言以三百人攻克之國楹失期不至越日

大兵大集立言獨戰連殺數十人馬蹶墜水死其子禎恨國楹詣其家欲手刃之我兵掩至乃與國楹同受執亦不屈死張夢錫字雲生鄞縣六狂生之一也董志甯華夏輩皆文弱

士司書檄奔走其間夢錫則於弓矢戈矛皆習之故嘗在戰陣中初入幕府魯監國授司務尋晉御史江上失守山寨大起曰馮家軍京第曰王家軍翊曰李家軍長祥其餘小寨支軍不可指屈而平岡張煌言之軍與夢錫大較軍相望故諸營呼之曰大張軍小張軍庚寅

大兵洗山寨大張軍航海入衛李家軍潰馮王二家相繼死獨小張軍五百人誓相守不去旣而我軍合圍夢錫挾長矛出鬪夷傷略相等力盡死五百餘人亦從死無一降者有三人突圍出翌日大較之南麓有負夢錫屍以葬者卽此三人也

陸宇燭字周明鄞諸生好奇計乙酉六月同董志甯華夏等

六人倡義薦紳無一許者沈吟良久曰是惟錢刑部可語但彼以喀血踰年不應客吾當排闥往見肅樂強起急應曰諾諾弗敢辭字爛曰決乎曰決矣遂不告於家以行事稍集而降紳謝三賓致書王之仁請殺六狂生之仁願與肅樂締盟字爛露章責三賓曰昔德祐之季謝昌元贊趙孟傳誘殺袁進士以賣國此執事之家風也今幸總戎不爲孟傳遂使執事不得收昌元効順之功以是知賣國之智亦不能保其萬全也三賓慚憤而已魯監國次會稽授監紀同知晉按察副使仍監江上軍時馬士英匿方國安軍大書暴其十惡罪乞梟首謝江左詹事王思任給事中莊元辰御史黃宗羲皆助之不報歎曰卽此已不堪立國矣遽棄官歸江上潰爲馮京

第王翊募兵榆林未幾皆敗脫歸里則翊首懸城西門謀之  
翊部將毛明山錢肅樂部將江漢者篡取以歸祀之密室舟  
山破閭部張肯堂孫以俘至語其弟宇燦使計脫之又於海  
上歸董志甯之喪以葬之己亥張煌言以孤軍入江北密爲  
飛書發使喜形於色事又敗王寅爲降卒所發捕至錢塘時  
已病猶自用計得脫出獄門而卒遺言諸子雖貧毋得妄求  
宦達子經異後竟以貧死宇燦偕其兄力持苦節張煌言之  
歿也設祭慟哭於不波航中一如其兄之祀王翊也家貧如  
洗而凡同難諸孤護之不遺餘力時論高之

毛聚奎字象來鄞縣人慷慨直多節概少與弟聚璧並有聲稱  
西臯雙鳳乙酉與於六狂生之列爲降人謝三賓所害幸不

死行營將士爭求識六狂生者聚奎曰狂者不量力之謂也  
量力則愛身愛身則君父亦不足言若謝氏子者是矣尋參  
瓜里軍以明經授戶部郎司餉曆監國旣敗奔走山海累遭  
名捕逐而免而家亦遂落晚歲始歸所著吞月子集有方石  
銘詞甚奇偉不具錄錄其輿人阜人丐人傳曰輿人者南都  
武定橋人不詳其姓氏乙酉之變夫婦同日縊死吾友吳子  
蕃親見其事爲弔之阜人者于姓江陰人乙酉之變傳新縣  
官至往執舊役諦視良久歎曰此寡廉鮮恥者吾不可以爲  
之役遂歸而縊時新縣官者湖州李某也丐人者姓氏與邑  
里俱未詳闖賊陷北都題詩養濟院自縊死吞月子曰夫輿  
人阜人丐人也汲汲赴義若此可異也噫無異也夫輿人阜

人而人人之微者也然而人也人則義其性之者也則亦有人而不與人卑人而人者乎夫人而不與人卑人而人者多矣不與人卑人而人者吾未數數見也予之爲三人者立傳也擬曰與公阜公而公三先生傳旣而思之今所謂公之先生之者皆其不與人卑人而人者舉與人卑人而人而公之先生之是不以人目之也故從而人之人之者人之也人之者則於不與人卑人而人而人之者也不異固所以異之也

華夏字吉甫定海人寄籍於鄞以恩貢入太學與同里王家勤齊名初與家勤同受業於上虞倪元潞漳浦黃道周己又同事劉宗周歸築鶴山講舍夏通樂律家勤精於禮不與先

儒荀同浙東所稱華王二子者也夏一諸生而有范滂陳東之風浙東資其清議以爲月旦乙酉六月越中兵起首與董志甯倡義豫於六狂生之目謝三賓欲殺之不得魯監國授兵部司務晉職方主事皆不受請以布衣從軍與太僕卿陳潛夫出戰生頭灣彈從頭上過如雨不少退性素勁挺卽與督師錢肅樂議亦不能盡合江上旣潰浙東士大夫猶惓惓故國山寨四起夏謂人心未去也及肅樂航海入閩連下三十餘城閩人告急浙中抽兵去備稍虛夏又謂此可乘之會謀之急丁亥始入舟山乞師於總兵黃斌卿不應憤而歸未幾慈谿有大俠以侍郎馮京第書往來海上事洩牽連捕夏入獄家勤與其友董德欽悉力營救出之旋復謁御史李長

祥於東山長祥曰吾於會稽諸城俱有腹心一鼓可集但欲得海師以張軍勢夏曰海師不足用也長祥以爲此間人以海師爲望可因其勢用之強夏再入舟山會馮京第亦在坐力勸斌卿斌卿曰我軍弱中土之助我者究得幾何夏慨然應曰布置已定發不待時何庸以寡助憂將軍至蛟關有范公子兆芝當以徐給事孚遠柴樓師會可六百人至鄞江楊推官文琦當以王職方翊大蘭師會可千人王評事家勤當以施公子邦煇管江師助可三千人張屯田夢錫當以大蛟師助可四百人而屠駕部獻宸當以城中海道麾下陳天寵仲謨二營之師爲內應可千人至慈谿馮職方家楨當以子弟親兵會可五百人至姚江則李侍御長祥當已下紹興遲



於東山之寨除道以俟而張都御史煌言當以平岡之師會  
可三百人渡曹江章都督欽臣以偁山之師會可二千人若  
急移小壘合李侍御軍西渡蕭山尙有石仲芳寨可千人將  
軍以此眾長驅入杭百里之內牛酒日至何庸以寡助憂斌  
卿輒不爲信夏益恨激之怒斌卿奮拳來擊曰吾今聽子倘  
諸軍爽約則取子肝以餉軍然特強許之而終無出師意無  
已廢然歸復令推官楊文琦往京第等益勸斌卿斌卿乃諾  
之夏偕文琦家勤等飛書發使以爲功有緒也而又爲謝三  
賓告變三賓初欲殺六狂生自度爲清議所不容及再降益  
決裂刊揭四布自言前此歸命之早後爲王之仁所脅今幸  
復得反正見天日然而卒不見用乃益思所以微功者廣行

賄賂中途賺取夏貽大蘭帛書告之我大府密調慈谿兵襲大蘭調定海兵勦管江調姚江兵搗東山三道兵皆潰捕夏急得之屆期舟山兵果入關抵三江口諸軍無一至者斌卿不敢進亟引去我巡按令知府大陳刑具究黨與夏慷慨曰心腹腎腸肝膽吾同謀也問帛書所載楊王屠董諸名言皆不預再拷之則大呼曰太祖高皇帝造謀烈皇帝主兵聖安皇帝司餉其餘甲申乙酉殉節諸忠范景文史可法而下皆同謀也知府三拷之終不屈而是日謝三賓亦爲人所告下之獄謝之初欲害五君子以求用於

新朝也不意我巡道孫枝秀暨其富欲并殺之取其室密使人說夏曰汝於謝讎深力引之則汝怨可伸及庭訊夏曰咄

斯反面易行首先送款之人也乃謂其不忘故國而預吾事  
吾目不瞑矣謝旁跪搏頤而呼曰長者長者夏在縲紲中鼓  
琴賦詩自稱過宜居士或叩之曰周公之過不亦宜乎何有  
於夏臨刑巡按曰非不欲活爾奈國法何夏曰事成則吾不  
汝置事敗則汝不吾置理也受刑時忽有白光一縷冲天去  
妻陸氏紉其首以殮自縊以殉先數日以次子名懔咫者密  
託夏之友人評事林時躍獲免有謝寅生者素與夏不往還  
在獄忽往詢之曰吾願以女許配公子子長竟分田宅以成  
立之蓋亦義士也監國還軍舟山贈夏檢討

王家勤字貞一鄞縣六狂生之一而與於戊子五君子翻城  
之獄者也初爲諸生南都立由選貢入太學乙酉六月與華

夏等同倡義魯監國授大理寺評事期年事敗諸遺臣分界立寨家勤主東南甄踰姜山至管江管江之豪施氏杜氏破產募死士三千人相與刺血誓師約舟山水師入關及諸山寨兵由陸路會於甯波城下是爲翻城之獄五君子者華夏楊文琦施邦价杜懋俊及家勤也而諸道所集莫如管江爲盛已爲降人謝三賓所發謀至家勤謂耳目有異率眾擒謀者搜得其檄斬之官軍旋至施杜乃據險關密遣死士衛家勤入海乞援中道見執時顧子者從行亦被縛三賓私授意謂多引薦紳可自免家勤怒叱之而顧子詐爲一紙諸名下咸與列由是衣冠之禍大作家勤遭不白冤華夏從獄中驚詢之悉其故三賓又布言曰王貞一靜默者非若華子必不

可活我巡按乃急移獄於省家勤曰吾豈望覆巢之完卵哉  
惟華楊施杜爲不可負累訊瞠目不語遂刑於市

楊文琦字瑤仲與弟文琮文瓚文球世所稱甬上楊氏四忠  
也父秉節素謹厚而以名節勗諸子里人呼曰楊太公江上  
之役秉節親帥諸子從軍文瓚崇禎己卯舉人魯監國授監  
察御史力言浙閩宜合不宜分即使主上屈節於天興將來  
無損於配天之業時方以開讀禮爲爭皆不謂然行人張煌  
言尤力排之文瓚乃入闕隆武帝召對又力言當聯絡閩浙  
以爲同讎不當啓爭端上然之賜食撤御前燈送之還邸丙  
戌春泉州饑按視請發帑金三千賑給歸而陳四難十失諸  
疏命巡按雲南力辭請如前旨以頒餉浙中圖會師鄭氏尼

之不果尋命掌貴州道扼防建延三關便宜招募初文  
泉州時上詢知有兄卽召文琦臨軒試之對言今日宜作馬  
上天子未可狃承平積習上韙其言以明經授惠安訓導旋  
加監紀推官監惠安諸軍是年六月浙東亡仙霞告急文球  
奉其父就兩兄商所向亂兵突過執父去重索萬金不則烹  
文球散髮狂號路人憐其孝不數日得泉數千緡齎入砦賊  
以數不足欲殺之文球對父長號賊感動令奉翁以歸閩事  
敗乃偕避於泰順之竹園時浙中止舟山未下而甯紹台山  
寨大起文琦與大蘭寨主王翊最善戊子翻城之議文琦獨  
主西南一道已爲降人謝三賓密揭告變並列文琦文瓚名  
旁及文球或勸之逃文琦曰吾以義動臨難不赴且將陷父

於危安用義爲然偕死無益吾力任之因遣弟輩入閩文瓚不肯乃獨令季弟文球變服走文琦就訊慷慨無撓詞但言文瓚不預謀請釋之養父而自請速死時華夏已獨承是獄欲盡脫諸同難文琦獨不可與夏同死於法文瓚得釋歸未幾復爲三賓所讎逮辟大呼高皇帝不絕而死文琦妻沈氏文瓚妻張氏皆殉之詳列女傳文球之入閩也督師錢肅樂已卒遂參閣部劉中藻軍事次年福安不守亦殉之時父秉節無恙僅存仲子文琮迨父卒以降卒告其出海狀且言將引海上軍趙彪者爲患遂亦被逮至省賦絕命詞自扼吭以死文琮官職方主事文球官都事皆魯監國所授官也我朝賜文瓚通諡曰烈愍

杜懋俊施邦价懋俊之仲父兆菡皆鄭之管江人世所稱管江三烈士也懋俊爲甯波諸生少憲言兵流寇亂中原海隅不逞之徒乘間起乃謀於兆菡請以土團之法陳諸有司遂部勒族人分隊瞭野擊柝行夜間黨爲之安堵沿海諸村皆效之丙戌浙東不守懋俊忽若病癰歌哭不常家人從壁罅竊窺則案無他物惟進士黃醢耀臣事君以忠文一首硃墨纍纍不絕邦价者故都督翰之子武世家而爲文諸生以蔭應襲而不赴國難作乃悔曰吾非襲爵無以號召人會錢肅樂起兵卽毀家輸餉監國許以左班換授部曹未上而江防潰戊子預於五君子翻城之謀懋俊聞而喜爲之集眾三千人且約侍郎馮京第軍爲應聞金莪山中有賣炭趙翁者精



星象諳兵法親往致之置軍中奉以爲帥未及期三日評事王家勤來奔以事洩告城中邏者踵至邦价卽梟邏者首與懋俊倉卒據山立寨鳴鼓起事而急令家勤先入海意謂城中雖有備而海師早晚必薄城則勢未能分故且部署軍士爲人海計城中兵果不出而我定海鎮將常得功豫遣舟師扼海口分軍直抵管江家勤中途被執山寨頗阨塞懋俊據險鬪三日矢石雨集夷傷殆盡寨陷猶以家丁力戰頭目中矢如蝟傷重倚牆斃屍屹立不仆者數日邦价縱火自焚其營拔世遺佩刀自刎兆祉被縛斫其首十二刀而後墜賣炭趙翁者跳而免後辛卯壬辰間猶往來海上衍其術尋亦死懋俊有子名憲琦陸宇燦撫如己出以父死國難縞素禁

酒肉有妻不娶宇燦以大義責之始婚旋病卒

屠獻宸字天生董德欽字若思鄞人也先世皆官兵部侍郎南都亡德欽痛哭納衣巾於文廟獻宸西探行省消息孫熊兵起參其事更自募一軍屯瓜漣之龍王堂授車駕主事德欽亦招軍輸餉授監紀推官屠氏之居侍郎故第也

大兵渡江後奪其半爲署有海道中營遊擊陳天寵仲謨者故史閣部麾下士屠董瞰知二將有異微說之二將乃屏左右言當閣部垂死遺言屬我輩必無負明心實勿忘願無所措力今觀公等非碌碌者願勿疑當効死力遂從衣領間出吏閣部遺牒示之且曰城下倘有警吾等縛兵備使以應三人大喜用少牢祀閣部盟於密室與盟者華夏王家勤楊文

琦及陳仲二將也夏與家勤乃奔走山海諸道合約大舉德欽獨請任餉先期斥賣家貲以待方聚謀時獻宸謂夏曰里中有外託氣節名而陰賊不可問者宜慎之夏疏不甚防已而果爲謝三賓所告陳仲二將猶秣馬待應而諸道兵已盡爲官軍所截事旣洩屠蓋跳至天台三賓又力構之遂急捕下獄與夏等同日死我

朝賜獻宸通諡曰烈愍獻宸妻朱氏投繯以殉詳列女傳

李文瓚字昭武鄞人也工詩古文詞兼書畫乙酉從錢肅樂起兵魯監國授兵部車駕司員外郎丁亥夏由天台入舟山將從監國於閩舟山諸同志者倚以中土之事勸其歸遂與於戊子翻城之禍時華夏欲獨承是獄故諸人有遜詞求免

者文瓚顧強項不撓在囚中與楊文琦分賦雁字詩彙成卷帙尋大吏分繫諸囚他所獨留夏文瓚請身伴之司獄者大駭曰汝不畏死邪文瓚笑曰白首同歸何恨適評事倪元楷以蓄髮下獄三人共一狴戶相與歌傳奇中木公不肯屈魔鬼曲聲撼獄壁聞者益駭再被拷終不屈而夏力辨之乃放歸文瓚歎曰過宜生我過宜之義我之慙也雖然我不求生過宜自成其義耳嗚呼過宜何曾死我虛生矣己亥張煌言兵敗微服走天台文瓚遇諸途以死士衛之煌言得復入林門事去乃遨遊四方以老臨終其子問遺言取筆題曰眾人皆醒非夫也瞑目而卒

男承禮編輯

仁和魏錫曾參校  
會稽梁繼元覆校

小腆紀傳卷第四十七終

小腆紀傳卷第四十八

翰林院檢討加詹事府贊善銜六合徐鼐謨

列傳第四十一

義師三

陳泰來

劉詔新等  
李含初

倪大顯

曾亨應

弟和應

子筠

劉士楨

郭賢操等  
王龍

鄒文鼎

胡定海

魏一新  
揭

胡夢泰

萬文英

唐

偶

余應桂

子顯臨  
金志達

吳孔微元

弟徹哲

蔡觀光  
郭天才

陳邦彥

白常燦  
彭燿

朱學熙  
陳嘉謨

陳泰來字剛長新昌人崇禎辛未進士由知縣入爲戶科給事中嘗自請假兵一萬肅清輦轂帝壯之改兵科出視諸軍

戰守方略奏界嶺失事狀劾副將柏永鎮論死遷吏科乞假  
歸南都以刑科起不赴閩中擢爲太僕少卿尋遷右僉都御  
史督領江西義軍闖賊餘黨掠新昌泰來大破之初益王之  
起兵建昌也泰來將從之同里按察使漆嘉祉舉人戴國士  
持不可曰公受閩命矣今復從王將奉王臣閩乎王必不屈  
將兩事乎是懷二心也公爲國事捐身家本以教忠而先示  
二心於人人誰諒之乃止已而建昌失援新昌破國士出降  
翻爲金聲桓用泰來恨之曰吾乃爲賊所紿彼固爲敵遊說  
也均之國事益與閩又何分乎意欲誅之顧力薄不能抗仍  
相通好時有上高舉人曹志明與魯國祺聶明時黃瑛黃國  
彥等兵起泰來與相結十二月攻取上新昌甯州戮國士

妻子及親黨數人暴其罪圍瑞州不克遂取萬載聲桓引  
大兵逼新昌守將出降泰來至界埠志明等從上高移軍會  
之進攻撫州俱歿於陣或曰國士與泰來爲姻聯已降權驛  
傳道事金聲桓使之招泰來而以重兵躡其後國士入陳營  
甫相見大軍已壓壘陣矣敗走黃氏祠中自刎死其同死者  
瑞州劉詔新謀廷椿胡親民我

朝賜泰來通諡忠節

李含初德化人乙酉降將金聲桓入南昌含初傾家起兵服  
山連破德化瑞昌未幾部將王拐子私款於我九江守將余  
世忠因襲服山含初死之同死者生員李映陽武生唐扉鄧  
士鳳熊九鼎宗麻子五人



倪大顯者樂平人與兄大恢大登俱以勇力聞乙酉饒州推官周損幣致之損敗歸督師大學士黃道周道周敗從廣信威武侯曹大鎬後王得仁大發兵屠樂平軍中聞大顯勇爭取之以爲功有僧長八尺餘下馬搏之大顯斫僧應手頭落已官軍鱗集度不支抽刀自刎死大恢大登被執皆死

曾亨應字子嘉臨川人廣東布政使棟之子也成崇禎甲戌進士官吏部文選主事詔起廢亨應以毛士龍喬可聘李右諫等十人上御史張懋爵有夙怨以納賄行私力攻之遂坐謫南都立凡謫籍起者多驟貴亨應獨不赴乙酉六月降將金聲桓令王得仁以兵徇撫州亨應乃命弟和應率父入閩已與舉人方南英前吏部揭重熙議守禦募兵未集騎已薄

城下眾皆散會益宗永甯王慈炎以建昌敗走閩廣招連子  
峒土兵數萬下建昌入撫州寓書亨應請爲東道主亨應喜  
募卒數百與相犄角走書大姓勸助餉張皇其事以冀四方  
之有應者一日置酒高會得仁偵得之潛從祝家渡濟師或  
馳以告亨應不之信言未既而兵大至亨應趨避石室中從  
弟某恨其賈禍指穴出之并執其長子筠筠大罵不屈立見  
殺得仁解亨應縛揖之曰公義士也時不可爲盍隨世以就  
功名乎否則雞犬肉矣亨應箝口不一答曳諸階下擲數十  
詢之復如前乃懸諸樹間令射之已復宛曲相慰終不可得  
仁歎曰此鐵石人也遂被戮弟和應奉父入閩闔失避之聲  
慶肇慶又失乃拜辭其父投井死同邑舉人王秉乾諸生湯

仲發亦以舉兵未集事露受刑最酷仲發顯祖孫也我朝賜亨應通諡烈愍

劉士楨江西龍泉人崇禎中由進士歷官應天府尹宏光帝立擢通政使是時北歸諸臣思起用行宮前章奏雜投士楨請嚴封駁參治之禁宗室朱統鐮承馬阮旨劾大學士姜曰廣並言士楨阻遏章奏士楨抗疏言曰廣勁骨慤直守正不阿統鐮何人揚波噴血飛章越奏不由職司此真奸險之尤者豈可容於聖世乞置諸理上柔不能問也尋擢工部右侍郎南都亡士楨歸龍泉起兵入泰和廬陵明年吉安再陷遣四子肇履入閩求援而令季子穉升從李陳玉起兵信豐爲贛聲援贛破避於南田戊子金聲桓王得仁叛歸於明復令

肇履募兵從劉一鵬圍贛州而令穉升趨南雄金王敗歸匿  
龍泉我郡守索之急乃絕粒死穉升後戰死長橋鋪

王寵吉水人初從劉同升起兵以所部不戢去往來臨吉撫  
贛間一日爲

大兵所獲寵詭降夜半殺其伴載其旗幟以行過新淦峽江  
令見旗幟以爲本兵也出迎江潯寵禽殺之連破二縣乃遁  
已同里鄒文鼎者與其從子敬起兵寵與之合

大兵至戰敗文鼎赴水死敬被執至省見殺寵復走脫別樹  
一幟大書追剿王寵四字譟呼殺賊而去去旣遠我兵始知  
其卽寵也明年金王反正遍招之不得寵已入山死矣

郭賢操德安人乙酉七月起兵連克德安建昌部將高長子

私款於我執賢操以獻時方議招撫釋勿殺明年四月集眾圖再舉

王師偵得環廬焚之跳而逸戊子金王之亂復投袂起爲我九江守將所執死之子七人次良錫與從子良銓攻建昌中流矢死三良鐸從島兵營戰死同起兵死者諸生桂登魁胡戒登魁妾胡氏殉之又武生胡伯仰亦死焉

胡定海亦作海定南昌人起家鄉貢以薦授汜水知縣操守廉潔致仕歸貧甚移居德興之海口授徒董氏董亦義俠也國變後破家起兵金川定海爲之聯絡鄉勇泊

王師取婺源金川兵絕我糧道乘

王師之退攻婺源殺我長吏已聞

王師將進討徒步乞師於黃道周比歸海口已有兵戰敗被執論殺首旣殊猶僵立不仆同死者爲揭新不知何許人我朝賜定海通謚節愍

魏一柱瀘溪貢生乙酉

王師下瀘溪以李光者署縣事一柱縛光送鄭彩所磔之與前令張載述畫策守瀘敗我師於密潭丁亥王得仁下令族瀘之丁傅魏三姓一柱遂棄妻子走閩襲破將樂結永西德化興安諸宗藩攻克建甯

王師攻之五閱月始破一柱與諸藩皆死惟興安王獲免載述事別見

胡夢泰字友蠡鉛山人崇禎丁丑進士知奉化縣邑人戴澳

官順天府丞其子怙勢不納賦夢泰捕治如法澳借他事陰劾之給事中沈迅發其隱澳下獄夢泰聲益起十六年夏吏部舉天下廉能吏十人夢泰與焉帝念畿輔殘破欲得治行已效者治之夢泰因得爲唐縣京師陷南歸黃道周之出師也夢泰拜疏請出湖東授兵科給事中協守廣信傾家募士與侍郎詹兆恆御史周定初守鉛山城陷夫婦同縊死我朝賜通諡曰節愍

萬文英字仲實南昌進士崇禎時爲鳳陽推官城破子元亨代死得脫歸宏光時以禮部主事召不赴隆武帝授兵部員外郎從黃道周出關

王師逼廣信道周令文英偕御史周定初分兵援之守鉛山

丙戌四月降將金聲桓逼鉛山文英與主事唐倜合軍出戰  
倜陣歿文英挈家投前湖死城遂陷倜太平諸生以熊開元  
薦授兵部主事我

朝賜文英通諡節愍

余應桂字二磯都昌人萬厯己未進士知龍巖調海澄邑瀕  
海多警築溪尾大泥兩礮臺繚以周垣而於中築關聯絡之  
沿溪砌石爲腰城二百餘丈置礮孔賊艘入擊之輒沈溺相  
戒不敢犯崇禎初徵授御史劾首輔周延儒納賄貶三秩七  
年出按湖廣守承天捐贖銀十餘萬募壯士繕城池器械賊不  
敢逼獻陵十年擢右僉都御史代王夢尹巡撫湖廣與總理  
熊文燦議撫勦不合構之逮下獄應桂乃陳撫勦始末白己



無罪而詆文燦疏入不省應桂嘗貽書文燦言獻賊在穀城必反可先未發圖之爲獻忠邏者所得文燦再糾應桂私書貽誤應桂再疏辨亦不納竟遣戍及獻忠反文燦誅起爲兵部右侍郎十六年十月督師孫傳庭戰歿命應桂代之應桂以無兵無餉入見帝而泣將至山西則僞官充斥遂巡不得前疏言賊眾百萬非全力勦之不可請調天下鎮將會師眞保之間如史可法王永吉其人者賜以尙方劍督師庶賊可滅帝批其疏曰應桂旣不入秦又不防河往來介霍庸怯可知奪職以新擢陝西巡撫李化熙代之化熙亦不能進也應桂家居每語人曰吾年六十四官尊祿厚復何恨所未了者欠先帝一死耳金聲桓之叛歸明也應桂起兵援之敗於落

星湖復傾貲募眾星子諸生吳江兵潰又援之我九江守將楊捷以步騎奄至城下應桂與子諸生顯臨同被執見殺於是江右義師略盡我

朝賜通諡曰節愍

吳江星子諸生戊子金王歸明江起兵應之

王師再定九江乃返南康爲據湖計結壘開先寺已敗走都昌得舊鎮張士彥之標將黃才潰兵二百人部勒之冀復舉而才復款於我執江以獻論死

金志達九江諸生戊子金王之變與僧了悟等集萬餘人以應南昌結營鄱陽彭澤間出戰池州取東流建德尋俱敗殲孔徹元孔徹哲建昌人家素封戊子與客蔡觀光起兵應金

聲桓及南昌被圍徹哲往援之潰歿徹元勿能忘也己丑秋七月訛傳瑞德七邑奉靖武遺宗徹元喜遽入城戕令已而各邑寂然同黨執以獻部眾迸散觀光心慙之庚寅揭竿將起跡露走鄱陽被獲論死

宋奎光不知何許人金聲桓之中軍官也戊子正月聲桓歸明攻我將高進庫於贛州以奎光爲左軍都督府都督僉事留守南昌奎光多機智能肆應五月

王師進討聲桓兄成勛部將楚國佐及王得仁部將貢鼇將內應奎光殺之人心稍定撤城外屋廬設守具

王師急攻得勝門城壞奎光囊土壘石隨壞隨補出神槍火筒焚攻具

王師少卻聲桓自贛歸奎光不納曰吾未知爾心爾果爲明者戰捷則相見也旣戰而入聲桓與得仁主堅壁議閉門不出奎光謂如是且坐困單騎渡江按行地利請移兵二隊一駐生米渡一駐市汶以達餉路俟敵懈則大舉逐之必獲算金王不從旣城中饑請背城一戰又請獨將其家丁赴敵營終不能得念諸將言人人殊不足與謀庶幾神道可以威眾德勝門闕廟中有酬賽神馬朝出就水草夕還廟調馴殊異奎光揚言夜夢關帝賜吾馬破敵備香醴入廟握馬不鞍而馳之三十六營兵將皆驚喜願聽約束從宋都督出戰金王終欲待外援夾擊奎光計復不行城破被執諭降不屈乃殺之

郭天才不知何許人金聲桓部將也魯監國攻福州我巡撫  
佟國鼎乞援於聲桓聲桓使天才將兵往與國鼎不合乃率  
眾降魯監國封忠勤伯戊子監國所復閩地盡失聞聲桓歸  
明乃還江西時

王師逼南昌聲桓謀撤兵入城天才謂非計爭之不得自割  
黃泥洲爲犄角所部盡川卒長槍敢戰精銳無敵屢戰城下  
與

王師數十合撓其長圍見城中無出戰意撤兵去久之糧盡  
亦入城城中斗米八十金人相食矣城破與前鋒劉一鵬巷  
戰不屈死

陳邦彥字令斌順德諸生宏光時詣闕上政要三十二事格

不用隆武帝讀而偉之既卽位卽其家授監紀推官未任舉  
於鄉以蘇觀生薦改職方主事監廣西狼兵援贛州至嶺聞  
汀州變勸觀生東保惠潮不聽永厯帝監國肇慶觀生遣之  
入賀邦彥甫進謁而觀生又別立唐王聿錫於廣州邦彥不  
知也夜二鼓上遣中使十餘輩召入梧州舟中王太后垂簾  
坐上西向坐丁魁楚侍語以廣州僭立事邦彥請亟還肇慶  
正大位以繫人心且云彼強我弱以戰則非計彼曲我直以  
和則非名警報日迫彼若知懼必來求成如其不然則粵東  
十郡我居其七委其三於彼以代我受敵我復從而乘其敝  
不亦可乎上大悅立擢兵科給事中令齎敕還諭觀生及入  
境聞使臣彭耀被殺遣從人以敕授觀生致書曉以利害觀

生猶豫累日欲議和不果邦彥乃變姓名入高明山中是年冬廣州破聿鏐與觀生死之列城悉下初贛撫萬元吉遣族人萬年募兵於廣得余龍等千餘人未行而贛失龍等無所歸聚甘竹灘爲盜他潰卒多附之眾至二萬餘丁亥春

大兵定廣州克肇慶梧州抵平樂上走桂林勢危甚邦彥乘間說余龍出圍廣州而已發高明兵由海道入珠江與龍會遺書張家玉曰桂林累卵但得牽制毋西使潯平間可完葺是我致力於此而收功於彼也家玉以爲然

大兵在桂林聞亂遣救揚言取甘竹灘龍卒素無紀律且顧家輒引退邦彥亦卻歸乃遣門人馬應芳會龍軍取順德賊敗應芳赴水死三月龍再戰於黃連江亦敗歿邦彥乃棄高

明收拾餘眾據下江門

大兵於廣州之圍訊降卒知謀出邦彥以輕兵襲其家執其妾何氏及二子和尹虞尹令爲書以招之邦彥判書尾曰妾辱之子殺之身爲忠臣義不顧妻子佟養甲壯焉頗以善遇後郡紳李皇一舉人杜璜帥兵攻肇慶敗死邦彥家屬始被殺秋九月密與陳子壯約復攻廣州邦彥後至夜戰大敗詳子壯傳邦彥奔三水清遠指揮白常燦以城迎奉乃入清遠與諸生朱學熙嬰城固守邦彥自起兵日一食夜則假寐與下同勞苦故軍最強嘗分兵救諸營之敗者至是精銳盡喪外無援軍越數日城破常燦死邦彥率數十人巷戰肩受三刃不死走朱氏園中見學熙自縊拜哭之旋被執饋之食不



食繫獄五日被戮事聞贈兵部尙書謚忠愍蔭其子爲錦衣衛指揮使我

朝賜通謚曰忠烈

彭耀順德舉人崇禎中官陝西知縣有能聲歷兵科給事中丙戌永歷帝建國肇慶而舊輔蘇觀生亦立唐王聿錫於廣州前大學士陳子壯移書瞿式耜請興師東向永歷帝曰先遣官諭之俟其拒命討之未晚乃遣耀與主事陳嘉謨宣諭廣州耀奉命過家拜祖廟託子於友至廣州以諸王禮見備陳天潢倫序監國先後語甚切至且讓觀生曰今上神宗嫡肩弈然靈光大統已定誰復敢爭且閩虔旣陷強敵日逼公不協心戮力爲社稷衛而同室操戈此袁譚兄弟卒并於曹

瞞也公受國厚恩乃貪一時之利不顧大計天下萬世將以  
公爲何如人也觀生怒殺之嘉謨亦不屈死我  
朝賜耀嘉謨通諡均節愍

男承禮編輯

仁和魏錫曾參校  
會稽梁繼元覆校

小腆紀傳卷第四十八終

小腆紀傳卷第四十九

前翰林院檢討加詹事府贊善銜六合徐鼎

列傳第四十二

忠義一

何剛

任民育

曲從直 周志畏 王纘爵

楊振熙等  
高孝纘等

文震亨

顧所受 殷獻臣  
蘇州儒士等

陸培

王道焜

顧咸建

兄咸正 弟咸受  
唐白綵 從子階豫  
過俊民

王佐才

項志甯等  
荆本澈

吳之蕃

侯承祖

子世祿

溫璜

葉向榮

王景亮

伍經正 鄧巖忠  
方召

李

桐

子文果  
文選

文昱

倪懋燾  
族人元楷

鄭爲虹

黃大鵬  
洪祖烈等

王士和

傅雲龍

金麗澤  
涂世名

洪有楨

毛協恭

補

郭符甲

諸葛斌

葉翼雲

弟翼俊

陳鼎

楊廷樞

劉曙

華允誠

從孫尙濂

何剛字慤人上海人崇禎庚午舉人英毅有才略見海內亂作與同郡士夏允彝陳子龍徐孚遠輩結幾社講求濟世事東陽許都亦以豪傑自喜者嘗從剛學剛謂之曰子居天下精兵處高皇帝嘗用之平亂矣盍不令成一旅以待用乎都歸散財結客招致數千人十七年春疏陳選練滅賊諸策帝

褒納之又言國家設制科立資格以約束天下豪傑此所以弭亂非所以戡亂也今救民生匡君國則莫急於治兵然平生未嘗學問一旦畀以兵戎孰能勝任臣願陛下親簡強壯英敏之士命知兵大臣教習之日講韜鈴練筋骨拓膽智陛下時召試之特優其秩寄以兵柄必能建奇功當一面臣嘗遊東陽義烏間見其人多智勇奮發忠義慷慨戚繼光書數言其兵可用昔時名將勁旅半出其地臣願以布衣奔走聯絡準繼光遺法申詳約東開導勸率并收徽婺奇才歲餘必可赴湯蹈火使諸分布河南郡縣則大寇不足平也因薦許都及進士杭州姚奇胤生員桐城周岐陝西劉湘客時諸人多遠徙而剛不知帝壯其言授兵部職方司主事募兵金華

無何許都爲邑令姚孫棐所逼及於亂募兵事無成會賊逼京師陳子龍夏允彝以二千人聯海舟達天津爲緩急計南都立子龍入爲給事中言防江之策莫過水師海舟之設更不容緩臣昔召募得二千人請委何剛訓練從之九月命防篙子港轉本司員外郎時朝廷草創庶務繁興剛言臣請陛下三年之內宮室不必修禮樂百官不必備惟日求天下奇士智謀者決策廉明者理財勇悍者臨戎朝政爵祿軍務不出三者驅天下材能以圖之求富必富求強必強若漫無經制空言恢復是卻行而求前也優遊歲月潤色偏安是株守以待盡也惟廟堂不以文辭取士而以實用爵人則眞才皆爲國用而朝廷亦少浮議矣令六度之士分兵四出求草澤

英雄得才多者受上賞則梟雄皆畢命疆場而內地亦鮮寇盜矣江南人滿徙之江北地方或以賜爵或以贖刑則豪右皆盡力農事而軍資亦充實矣臣竊觀廟堂經國者徒欲襲晉宋之餘業恐未必能及晉宋也尋命以其兵隸史可法可法甚奇其才剛亦以遇知己誓同生死尋授遵義知府未赴大兵破徐泗泗軍退屯瓦窑鋪剛以所部會之及逼揚州因率之入衛可法曰城危矣死無益也不如出城號召援兵以爲後圖剛歎曰剛計之熟矣天命已去民心瓦解誰復應者剛爲國家死則死之爲知己死則死之濡忍而無成非智士也城陷以弓弦自勒死我

朝賜通諡曰忠節

任民育字時澤濟甯人天啓時舉於鄉善騎射爲鄉里捍衛  
眞定巡撫徐標薦其才用爲贊畫經理屯務眞定失守遂南  
還宏光時授亳州知州兵燹後戶口死亡略盡民育覈州田  
計一萬九千頃荒者半焉乃併八十里爲四十里止徵現戶  
民感其恩擢揚州知府督師史可法倚之城被圍以戎服守  
鎮淮門城破馳歸易緋服端坐堂上曰此吾土也當死此左  
右皆奔散獨吏陸某者侍兵至欲擁之出不可遂死之闔家  
男婦俱投井死吏亦自經以殉我

朝賜通諡曰忠節

曲從直字完初遼東舉人官揚州府同知與其子分守東門  
父子皆死我



朝賜通諡曰烈愍

王纘爵字佑申鄞縣人工部尙書佐孫以蔭入太學授應天府通判攝溧水篆清介剛直忤上官投劾歸乙酉請赴史可法軍前自効授揚州監軍同知尋擢按察僉事時可法內困讒口外惟諸鎮不用命一日謂纘爵曰君書生不知兵徒死此何益吾當送君還留都作後圖可乎對曰下官世受國恩豈敢避難願從明公死不願從馬阮生也可法改容謝焉城破遂從死子兆牙有異才痛父殉難不忍家居躑躅揚州竟野死我

朝賜纘爵通諡節愍

周志畏字一畏與王纘爵同邑崇禎癸未進士官江都知縣

年少氣高果於決事高傑將士在城暴橫志畏屢戢之反受  
挫辱不勝憤求解職會羅伏龍至可法卽命代之伏龍新喻  
舉人曾知梓潼縣代志畏受事甫三日城陷兩人皆死而志  
畏妻子僕隸闔門殉義無一脫者其時兩淮鹽運使楊振熙  
揚州監餉僉事黃鉉通判吳道正江都縣丞王志端亦皆死  
振熙臨海舉人鉉彭澤舉人道正餘姚人志端孝豐人行事  
俱軼我

朝賜志畏通諡烈愍伏龍振熙道正志端均節愍又李自明  
者嘉興人以歲貢除揚州訓導亦死於難

高孝績揚州諸生城破書衣衿曰首陽志睢陽氣不二其心  
古今一致入學宮投先聖座下自經死同時王士琇於新城

垂破之日設烈皇帝位號哭載拜與其弟並縊死又有王績  
王績王績者昆季三人俱自沈醫士陳天拔畫士陸愉武生  
戴之藩義勇張有德市民馮應昌舟子劉某皆死之時士民  
死者屍凡八十餘萬而姓名多不傳補

文震亨字啓美吳縣人大學士震孟弟也天啓中與璫禍崇  
禎初以善琴供奉官中書舍人南都妖僧大悲之獄阮大鍼  
造十八羅漢五十三參七十二菩薩之目羅織朝野之異已  
者其黨張孫振已具疏將以震亨爲汪文言矣馬士英與震  
亨有文字交力出之卽休致歸乙酉六月

王師取蘇州避之揚城聞薙髮令下自投於河家人救之絕  
粒六日死震孟二子秉乘是年我巡撫土國寶獲吳易偵卒

言乘與諸生王伯時皆易黨謀內應乘遂遇害秉著有啓禎  
野乘我

朝賜震亨通諡節愍

顧所受長洲諸生我安撫使黃家鼎至蘇州所受賦絕命詞  
云身是明朝老布衣眼前世界不勝悲從容死向宮牆地免  
使忠魂棄濁渠遂自縊學宮遇救仍赴水死殷獻臣亦諸生  
避兵荻溪見家人有薙髮者號慟不食死又蘇州儒士者名  
姓不可詳聞南都被儒冠襦衫躍入虎邱劍池死常州石生  
暨賣扇歐姓者投西廟池中死文城壩賣柴人閻安撫使至  
棄柴船躍河死五牧有畜鴉烏薛叟自經死元妙觀前有賣  
麩夫婦對縊死

陸培字鯤庭仁和人少負俊才美丰儀行誼修謹嘗客華亭主人妾窺而悅之培不答卽放舟去登崇禎庚辰進士不謁選歸而讀書所爲詩文一時爭效之號西陸體性峻潔有不可意輒瞋目叱罵與陳潛夫有違言卽爲文以逐之於是傳者謂其任俠使氣然與人交重然諾急困阨雖患難死生不易也南都授行人乙酉六月

大兵至浙巡撫張秉貞與陳洪範謀挾潞王降培慟哭攜家避橫山之桐嶺道遇其友陳廷會語以故廷會曰君職行人無守土責且天下事未可知無己國亡與亡不亦可乎培仰天歎息曰需乃事之賊後日將有求死不得者子不見北都某某乎將自裁妻晝夜防之一日給妻他往脫身歸故居鍵

戶自經妻兄子破壁救之甦培大恨曰奈何苦我夜上書辭  
母作絕命詞揖其二僕以繩授之曰我爲烈士若輩宜成我  
志坐方牀從容就縊死年二十九閩中贈尙寶司少卿諡忠  
毅我

朝賜通諡曰忠節

王道焜字少平仁和人少豪宕好聲伎家藏書畫尊彝古器  
最夥焚香賦詩竟日無俗語天啓辛酉舉於鄉歷福甯州學  
正陞南平知縣南雄邵武二府同知光澤妖賊亂道焜攝光  
澤縣事單騎往諭降之崇禎帝破格求材盡徵天下廉能吏  
臨軒親試撫按以道焜名上吏部謂郡丞例不與選授兵部  
職方主事道焜不平抗疏言皇上破資格以待非常銓臣援

故例而靳考選非陛下搜羅賢豪之至意得旨許候考會都城陷微服南歸聞陸培死慨然謂子均曰我當死久矣所以不死者將以有爲也今更何望哉且向者銓曹以故事格我卑我官也今而不死天下將謂屬吏中固無人矣乃投繯死浙東監國贈陸培諡而不及道焜董守諭曰兩人同死豈以道焜非進士邪乃諡節愍我

朝賜通諡曰節愍均舉崇禎壬午鄉試

顧咸建字漢石崑山人大學士鼎臣孫也崇禎癸未成進士兄咸正同科授推官咸建得知縣選錢塘時浙中連歲水祲米價騰貴民間削樹皮採草根爲食而三餉疊加長吏以解額爲殿最里甲往往雉經倉門咸建分兩稅爲十限令同甲

自相曉諭不以官符追攝集父老告之曰寇患若此征餉非得已也爾曹受列聖深仁獨不思急公分上憂而煩我遺胥隸乎民歎曰使君愛我我何敢以逋課負使君輸者填溢無後期俄聞京師變人情洶洶咸建出令安民戢奸宄嚴警備宏光時御史彭遇颺爲馬士英私人出按浙江橫甚遺奴輩四出剽敗民聚譁於署遇颺出兵擊殺七十餘人民激思變咸建馳撫之得已遇颺旋劾罷乙酉南都失守鎮江守將鄭彩率眾還閩緣道劫掠咸建出私財迎犒率吏卒日夜防禦乃斂威去亡何馬士英擁兵至巡撫張秉貞命咸建往迓咸建力請駐師城外頃之大將方國安兵亦至咸建謀於上官先期遣使行賂兵乃不入城四鄉被掠而城中得無擾時監



司及郡邑長吏悉逋竄咸建散遣其妻子獨守官不去旣而  
大兵壓境秉貞將挾路王出降使咸建犒師旣復命卽棄官  
出城去追騎及於吳江執以還詞不屈閏六月朔殺於忠清  
坊士民徒跣號泣懸首城樓一蠅不集閩中贈太僕少卿諡  
忠節我

朝賜通諡曰忠節

咸正字端木崇禎癸未與弟咸建同舉進士授延安推官屢  
擒劇盜招降猢猻張成儒等三百人慶陽土賊潘自安等干  
人孫傳庭之出關也上書止之不聽已陝西全陷咸正被賊  
繫之營中吳三桂兵入秦人多應之韓城人推咸正爲主己  
而知爲

大清兵遂入山中久之南歸以子天達天遴匿陳子龍事被逮洪承疇問曰汝知史可法在乎不在乎答曰汝知洪承疇死乎不死乎乃父子同見殺弟咸受字幼疏天啓甲子舉人崑山城陷殉難我

朝賜咸正通諡節愍

唐自綵字西望達州貢生崇禎末授臨安知縣過俊民無錫貢生爲臨安訓導臨安酤朴易治自綵政暇則與俊民飲酒賦詩士民愛信之乙酉六月

大兵至邑人震恐自綵歎曰戰無兵守無食無徒苦父老爲也冊印俱在聽邑人之所爲我老矣豈復北面事二姓哉與從子階豫攜家人入梅鄔俊民亦同匿士民齎冊印赴省大

帥問曰若知縣安在曰賢父母也憐我民之被干戈不能守  
士入山隱矣帥曰果賢邪我還汝知縣不遣他吏也民乃入  
山迎自綵旣閱兩月堅不出乃置新令新令欲自媚詭言自  
綵受魯監國敕陰集兵爲變總督張存仁遣兵捕之時值八  
月下丁俊民語山中諸生曰我爲學博猶廟祝也可令缺祀  
乎具牲醴入城南初獻而執自綵之兵至見冠帶執笏堂上  
者問何人曰學官也因前繫之俊民大罵被殺自綵至不屈  
洪承疇曰汝毋自苦我知汝賢行且薦於朝自綵語不屈承  
疇指其下曰獨不念少妾幼子乎曰大丈夫豈以子女易大  
節乎當自綵被執時麾其從子階豫走不聽竟同死妾大呼  
曰主死妾願從幼子有乳媼在延頸受刃死閩中贈自綵太

常少卿階豫貢生贈太常博士我

朝賜自綵通諡忠節

王佐才字南揚崑山人官狼山副總兵年老休於家乙酉夏  
南都亡知縣楊永言逃之泗州參將陳宏勳家縣丞閻茂才  
遣使投誠已貢生朱集璜等起兵殺茂才以佐才宿將推爲  
主永言宏勳亦自泗橋率壯士數百人來助未幾宏勳以舟  
師戰敗遊擊孫志尹陣歿城遂陷佐才縱民出城冠帶坐帥  
府被殺我

朝賜通諡曰節愍

項志甯徐市徐懌徐守貞馮知十皆常熟諸生乙酉城破殉  
難者也先是邑人議城守會總兵何沂奉宗室某王至因以

集眾降將洪某引

王師來攻近已遁諸生中尙有躬冒矢石力戰於華蕩者勢不支各散去志甯方食餅聞變餅墮地扼吭死市與樸歎曰我家世科第可無義士邪題壁云不敢立名垂後代但求靖節答先朝自縊死守貞奉母避於鄉兵至母與妹投井守貞急從之兵挽其髮乃踞坐謾罵殺於井傍知十見之奮怒格鬪叢射死

荆本澈字太徽丹陽人崇禎甲戌進士官副使南都破起兵松江與巡撫田仰總兵張士儀張鵬翼太監李國輔以舟師奉義陽王進駐崇明沙戰敗率所部屯舟山之小沙壘其將士善射爲黃斌卿所忌本澈復不能戢其士卒斌卿因民怒

攻之全家遇害我

朝賜通諡曰節愍

吳之蕃吳淞陸營把總也父斗南於崇禎時以討流賊死之蕃嘗自謂忠孝之門乙酉南都亡聞部下百戶降怒曰奴輩皆世職降何易也俟大明兵得汝定鑿汝筋抽汝骨也八月十六日起兵至吳項橋登岸謀攻嘉定邑人武舉馮嘉猷者以獻策降將李成棟得署總兵聞報謂老營兵曰汝曹聞之蕃前日語邪脫不利我與汝皆碎首矣遣人焚之蕃舟之蕃眾多烏合見火起遂潰之蕃殺數人不能定呼天哭曰我父子並死王事分也所恨心力殫盡得起義師未戰而潰我目不瞑矣挺鎗欲赴闕居民汪三者誘之同行推之墮水遂被

擒嘉猷陳鼓吹羊酒犒得勝軍縛之蕃罵之曰汝吳淞牧兒何敢作此事之蕃大笑曰我朝廷世臣父子忠節汝曹逆賊狗彘所不食何敢以面目向人遂被殺

侯承祖字懷玉世襲金山衛指揮乙酉夏松江兵起以兵往願襄事提督吳志葵忌之沮其謀承祖恚曰然則府城聽之總戎承祖以金山爲存亡耳拂袖歸與子世祿治兵嚴禦未幾志葵敗松江亦破

大兵進攻金山承祖坐睥睨間親冒矢石緣城上者手刃立盡屢進屢卻久不能拔旣而降將李成棟自江陰還師來助有內應者啓水門以入承祖率世祿親兵猶巷戰踰時眾且盡世祿身受四十矢被獲罵成棟不絕口見殺承祖亦被執

說之降曰吾家自始祖以開國勲子孫不替食祿二百八十年今日不當一死報國哉至文廟前曰此吾死所望先師再拜飲刃死我

朝賜通諡曰忠烈

溫璜字寶忠初名以介字于石烏程人幼而孤母陸孺人苦節姑沈氏老且病貧無帷帳坐臥一板箱孺人事姑教子種火煨芋以爲食璜久爲諸生有學行母歿廬墓出入爲文以告崇禎丙子舉於鄉祈夢于忠肅祠始易名璜爲首輔體仁之從弟而夷然自守與東林結契名在復社第一集南都之以揭帖逐阮大鍼也璜曰阮大鍼爲眞小人錢謙益則僞君子眞者易知僞者難測斯人得志卽小臣亦當裂麻爭之癸



未成進士授徽州府推官年五十有九矣甫蒞任京師報陷引佩刀曰此身當付汝矣募民兵繕城堞爲保障計乙酉南都覆知府秦祖襄及僚屬皆遁歎曰城無主民且自相屠乃盡攝諸印召士民慰諭之眾感泣願守遠近從而保守者數萬家與僉都御史金聲爲犄角轉餉給其軍徙家屬於淪杭村令諸吏不得通私問凡四閱月聲敗嚴兵登陴郡人故御史黃澍以城獻璜抽刀將自刎吏持之請歸村舍乃趨還語妻茅以同死茅無難色具酒坐談夜將闌匿幼子於別室急呼長女寶德起女年十四方熟睡問何爲曰死爾女卽延頸就帨未絕復刃之茅整衣以臥璜刀截其喉有頃呼曰未也再刃而絕乃書遺令曰世受國恩惟以死報薄棺火葬不必

完屍投筆長嘯卽自刎越日復甦居人昇至我大帥幕府進之食揮之又五日兩手自抉其喉而死時九月二十九日也我

朝賜通諡曰忠烈

葉向榮金華舉人崇禎庚辰以薦舉授甯都知縣廉明有惠政有賊邱旭東行劫鄰邑向榮捐金購賊獲其魁七人闖賊寇江西去甯都百里爲營向榮晝夜登陴賊知有備不敢犯旣而賊屯馬羊坑先伏十人於關下向榮偵得立殺之陳屍於郊自督鄉勇銜枚出擊斬首二百餘生禽賊渠十五人餘賊竄去宏光時總督袁繼咸御史周燦交章薦之以忤馬士英意量移吉安同知向榮遂投劾歸明年夏金華城將破具

衣冠投項村之野塘死

王景亮字武侯吳江人崇禎末成進士宏光時授中書舍人  
隆武時擢監察御史加太僕寺卿巡按金衢兼視學政衢乃  
唐魯之交政令不一魯監國亦置官並守景亮奉命通好於  
魯居久之未有以報命城破自縊死伍經正安福貢生爲西  
安知縣隆武時擢知衢州府事兼攝道印亦受命於魯城破  
赴井死鄧巖忠江陵人由鄉舉官衢州推官城破自經死方  
召宣城諸生署江山知縣金華被屠集父老告之曰兵且至  
吾義不當去然不可以一人故致闔城被殃遂封其印綬具  
冠帶北向再拜赴井死士民爲之收葬立祠以祀我

朝賜景亮經正巖忠召通謚俱節愍

李桐字封若鄴人也三歲而孤事母以孝聞讀書通大義前輩董其昌曹學佺深器之甲申之變桐於大臨所請發義旅次江干以待撫臣勤王之師守道廬若騰是之然未能應也桐日號咷當事馬前並詰責諸鄉老遂遭嗔怒至有欲殺之者尙書馮元飈曰諸公卽力薄不能報國讎奈何更殺義士與若騰共呵護之得免南都亂政悒悒不得志遁入白鷗莊南都亡昕夕祈死疾遂篤已聞錢肅樂起義則霍然進食遣長子文景從軍肅樂疏授兵部主事已而事不支疾復篤丙戌六月江上潰桐曰吾今定死矣於月之十九日卒門人私諡曰貞愍文景哭謂其弟文昱曰汝知吾父所以死乎葬畢相與墨縗赴海上崎嶇兵間文昱亦授戶部主事辛卯秋舟

山失守從監國航海舟覆兄弟同溺死惟少子文暹杜門養母以孝稱云

倪懋燾字仲晦鄞人乙酉夏郡中錢肅樂起兵降人謝三賓密札定海總兵王之仁請殺首亂者時之仁已迎降仍故官矣肅樂欲通一言而難其使懋燾獨慨然請行至定海則路人洵洵言昨有陳秀才上箋詆大將軍降大將軍殺之聞者股栗俄三賓使繼至懋燾神色不動有頃之仁召懋燾入曰君此來大有膽懋燾曰大將軍世受國恩賢兄常侍攀髯死國天下所具瞻知大將軍之養晦而動也方今人心思漢東海鎖鑰在大將軍次之則滄洲黃將軍石浦張將軍左提右挈須有盟主大將軍之任也之仁遽遙手曰好爲之且勿洩

令其子鳴謙飯懋燾於東閣而別召三賓使入見報書亦云  
十五日至鄞議之三賓使出乃遣懋燾歸曰語錢公當具稿  
師禮懋燾出喜曰吾事諧矣翊日之仁至果脅三賓出餉萬  
金贖罪肅樂勞懋燾曰此李抱眞之招王武俊也而君以三  
寸舌成之功過之矣及畫江守定魯監國授懋燾職方主事  
參瓜里軍閩中頒詔之聲浙使陳謙入閩死閩使陸清源入  
浙亦死懋燾請往解之隆武帝大悅授僉事分守建甯時標  
兵爲鄭氏撤去乃捐俸召募丙戌秋八月

大兵至城下力戰不支死一軍盡歿其族人元楷字端卿同  
起江上官評事兵潰還里以不雍髮被收論死日坐囚中與  
華夏李文繼高歌木公不屈魔鬼一曲聲撼獄壁一夕飲大

醉及醒握髮則禿矣痛哭欲自裁家人謂是母命乃止歎曰  
吾不得與仲晦白首同歸矣其後苦節四十年而卒

鄭爲虹字天玉江都人崇禎癸未進士除浦城知縣隆武帝  
之入閩也道浦城聞其爲廉吏欲拔置左右部民相率乞留  
有十不可去之疏乃令以御史巡視仙霞關駐浦城鄭芝龍  
部將奪商人米爲虹繩以法芝龍入訴上諭解之尋令巡撫  
上遊四府兼領關務紀綱肅然將士斂迹迨芝龍旣撤守關  
兵仙霞嶺二百里間虛無一人

王師長驅直入浦城百姓旣獻城乃擁爲虹見貝勒令之跪  
不屈勸之雜髮爲虹曰負國不忠辱先不孝甯求速死髮不  
可雜也又責令輸餉爲虹曰清白吏何處得金百姓欲代輸

贖死爲虹曰民窮財盡烏乎可大罵奪刀自刺胸膛不死遂  
見殺大鵬字文若建陽人少孤貧不能從師從旁竊聽遂知  
書能屬文崇禎庚辰進士知義烏縣有聲隆武帝召爲兵科  
給事中兼治兵餉以仙霞重地宜使閩人自爲守令協爲虹  
守仙霞被執南向立不屈死浦城人皆廟祀之我

朝賜爲虹通諡忠烈大鵬烈愍又有洪祖烈者吳江人以武  
進士厯官京營神樞參將南都陷隨扈入浦被執不屈死浦  
城千戶張萬明及其子都司翹鸞皆同日死又同安破都督  
同知義烏傅起燿閩清破知縣西安陳其禮偕子龍玉婦吳  
氏堦徐應宜不屈死我

朝賜祖烈其禮通諡節愍起燿烈愍



王士和字萬育金谿舉人隆武時避亂入閩謁選得吏部司  
務陳時政闕失凡六事曰文職廣而妄銜者多武弁驕而立  
功者少陞遷驟而責任益輕議論煩而實用惟寡聽納博而  
精神愈勞移蹕頻而民生日苦疏列數千言上讀之曰此苦  
口良藥也朕朝夕省覽爾諸文武亦共儆戒令刊所奏分賜  
之丙戌夏擢兵部主事未一月授知延平府時延平爲駐蹕  
地重委之也八月仙霞關不守上倉卒奔汀州留兵部侍郎  
曹履泰偕士和居守俄警報疊至召父老告之曰郡守與城  
存亡若等當自爲計毋以數萬生靈膏斧鑕也眾泣士和亦  
泣退入內署謂其友曰吾一介書生數月而忝位二千石恩  
亦厚矣不死人且謂主上不知人友勸止之正色曰君子愛

人以德君何出此言邪從容自縊死我

朝賜通諡曰節愍

傅雲龍金麗澤均不知何許人崇禎末雲龍官漳南道麗澤知漳州府有廖淡修者聚眾作亂蹂躪漳平甯洋龍巖間麗澤與參將顏榮討斬之丙戌九月

王師入漳州雲龍麗澤暨龍溪知縣涂世名同死之我

朝賜雲龍麗澤通諡節愍

涂世名字仲嘉新城人天啓丁卯舉人御史伯昌從子也偉幹脩揖善飲談古今事慷慨激烈隆武時知龍溪縣

王師入漳州世名被執呼子常吉遣之行常吉曰父在兒焉往遂并死焉僕黃錫黃羊王亨蔣三同日俱殉漳人士素德

之醕金三百兩歸其櫬言之有泣下者我

朝賜通諡曰忠節

洪有楨字亮士福建嘉禾里人也早歲工書賈人持售外國得重價蓋醕謹儒生也丁亥二月忽從俠客糾海邊壯士數百人入據漳浦魯監國嘉之卽以爲令守之未幾城復陷被執見我大帥不跪曠目罵不絕磔於市懸其頭於城之東門數日色不變一卒投諸濠中夜狂叫若有擊之者乃羅拜而瘞之同時有楊淶者亦不屈死我

朝賜有楨通諡節愍

毛協恭字端甫武進人崇禎庚辰進士知甯德縣南都授陝西道監察御史隆武時命提督福建學政丙戌八月

王師入閩協恭適試士興化聞變痛哭躍入水遇救不死轉徙泉州建甯問土寇發力疾趨崇安明年七月在道爲

王師所執大帥欲降之協恭厲聲曰若亦知毛提學乎尙奚道乃被殺妻周氏與其子女躍水死僕鄒良王大郎亦死我朝賜通諡曰節愍補

郭符甲晉江人崇禎癸未進士官南京戶部主事國變後家居丁亥朱成功會師泉州之桃花山符甲與邑紳沈佺期起兵應之戰歿屍暴七日如生鄉人義而葬之我

朝賜通諡曰節愍

諸葛斌晉江人光祿卿倬從子也隆武時爲監紀推官從朱成功起兵泉州之桃花山我西門守將楊義謀內應有成約

矣而我提督趙國祚召義守東門斌不知夜率眾臨城與副將蔡參等全軍俱歿

葉翼雲字敬甫同安縣廈門人崇禎庚辰進士知吳江縣捕奸民朱和尚文選司吳昌時貽書爲緩頰拒不應歲大旱蝗翼雲按捕蝗法當於露趨溼濡時乃夜行田間令輕罪以捕蝗贖災不爲害時有議加賦者條上其不便縣省六萬有奇十六年東陽許都之亂列郡大震翼雲練壯士治樓櫓北都陷廉得土匪主名捕殺之一邑帖然巡撫祁彪佳巡按周元泰列其治狀爲上考以催科不及格爲昌時所阻吳民譁曰吾曹奈何累公爭相輸納不旬日完二萬七千有奇臺臣歎曰生祠去思碑可作而致惟卸事官不事敲朴而完糧幾三

萬非得民心胡致此起禮部主事轉吏部以親老歸閩中擢  
稽勳司員外閩亡謁朱成功於安平成功令以便宜視同安  
縣事與訓導陳鼎助部將邱縉林壯猷金作裕城守城陷翼  
雲曰今日猶得死於明土吾輩之幸也與其弟監紀推官翼  
俊同遇害鼎縉壯猷作裕皆死之鼎字尙圖天啓丁卯舉於  
鄉同安人我

朝賜翼雲通諡烈愍

楊廷樞字維斗吳縣諸生天啓朝顏佩韋五人之難廷樞實  
倡之佩韋等死廷樞獲免舉崇禎庚午應天鄉試第一國變  
隱居鄧尉山魯監國遙授翰林院檢討兼兵科給事中丁亥  
四月以門人戴之嵩通吳勝兆株連被逮慨然曰于自幼慕

文信國之爲人今日之事素志也丹中書血衣遺其孤曰惜時命之不猶未登朝而食祿值中原之多難遂蒙禍以捐生其年丁亥之建爲日孟夏之終方隱遁夫山椒忽陷罹於羅網雖云突如其來亦已知之稔矣但因報國無能懷忠未展終是人臣未竟之事尙孤累朝所受之恩云云綴以絕命詩十二首五月朔我大帥會鞠於泗州寺巡撫重其名欲生之命之薙頭廷樞曰砍頭事小薙頭事大乃擁出至寺橋臨刑大聲曰生爲大明人刑者急揮刀首墮地復曰死爲大明鬼監刑者咋舌乃禮而殯之己丑永厯帝以尙書魯可藻薦將召用旣聞其殉難乃贈翰林院侍讀我

朝賜通諡曰忠節

劉曙字公旦長洲人也崇禎癸未進士宏光時授南昌知縣未赴而南都陷歸隱蠡口監國魯王之駐舟山也諸生欽浩疏吳中忠義之士二十餘人於冊首列曙名將進之曙不知也渡海爲松江提督吳勝兆邏卒所獲勝兆藏之旣而勝兆事敗巡撫土國寶搜得冊遂名捕曙曙衣冠就繫賦絕命詞曰孤臣孤子淚如泉死傍君親卽灑然吾道直如弦上矢此心清似水中蓮枕戈未雪河山恨濡筆空勞史冊傳欲戀春暉報慈母登堂愁賦白華篇見國寶曰吾世受國恩南都之變已辦一死特以父喪未葬老母在堂延喘至今願速死見高皇帝耳國寶令具通海狀曙曰起義吾素志恨不手刃汝輩耳白梃交下血灑地有聲猶罵不絕口械至南京洪承疇



齊顏相勞苦答如前承囑曰汝不念老母邪曰君親原非兩人臣子豈有二理發按察使盧某鞠之潯暑中匍匐十餘里狂呼欲絕盧聞而驚甚進以水問何故兩年不謁地方官對曰幼承祖宗清白之訓爲秀才時便如此若以不見官長爲罪豈所以教天下之廉恥乎婉諭之不屈乃與崑山顧咸正松江夏完淳同下獄丁亥九月十九日赴市同刑者三十餘人我

朝賜通諡曰節愍

華允誠字汝立無錫人早有志行受易於同郡錢一本中天啓壬戌進士對策極陳奄寺之害主者不敢進呈置二甲乃從同里高攀龍講學首善書院傳其主靜之學旋從攀龍入

京授工部都水司主事魏奄日熾攀龍去官歸允誠亦乞假  
同行崇禎改元起營繕主事轉員外郎命督琉璃廠減經費  
數萬明年冬京師戒嚴諸曹郎分守城門以守禦不備多杖  
下樊允誠守德勝門四十餘日不稍懈帝微行察知之賜白  
金敘功復加俸一年久之調兵部職方員外郎疏攻閹臣溫  
體仁吏部閔洪學朋比植私奪俸半年詳明史尋以終養歸  
里居十二年事母色養備至母八十三而終南都立起驗封  
員外郎署文選司事蒞官十三日見高宏圖徐石麒等先後  
去位卽引疾退乙酉後屏居墓田杜門讀易戊子四月有訐  
其不薙髮者逮至江甯滿漢官並緩言款之允誠直立南向  
舉手曰二祖列宗神靈在天允誠髮不可薙身不可降因賦

絕命詩臨刑顧從孫尙濂曰心卽太虛之心太虛中何嘗有  
刀鋸斧鉞清其刀鋸斧鉞不得加焉之心亦安往不得哉遂  
見殺年六十一尙濂字靜觀亦同死僕薛成聞主被執長慟  
不食先一日死訃至僕宋孝號哭觸堦死我

朝賜允誠通諡節愍

男承禮編輯

仁和魏錫曾參校  
會稽梁繼元覆校

小腆紀傳卷第四十九終